



Fasnacht 2023: Mir schwinge mit!

Mir schwinge mit – stygge zämme in d Hoose,
Doch nit nur am ESAF – jä jetzt muesch loose,
Vor drey Joor hetts ghaisse: „Duet ys laid,
S isch umme und verby – alles absait!
S gitt kai Fasnacht drumm die Bitt,
Haltet eych drah und schwinget mit!“

So hänn mirs gmacht, hänn ys drah ghalte,
Hänn ys wie nit ganz bache verhalte,
Händli wäsche nit vergässe:
am Morge, z’Oobe, vor und nonem Ässe.
Desinfizieret alles was es gitt,
Zieh dr Mundschutz ah und schwing mit.

Allewyl hänn mir druff gwartet,
Bis wieder e Mediekonferänz startet,
Zwische hoffe und au bange,
Hett mänge s Spinne ahgfange,
Doch dasch egal – oder nit?
Hauptsach s schwinge alli mit!

Corona do und au deert,
D Wäld isch langsam gsteert,
Die letschti Generation duets au yberdryybe,
Glääbe sich uff Boode – die hänn doch e Schyybe.
Sy schreye dy ah mit dr Bitt:
Mach d Auge uff und schwing mit!

Am ESAF putzt sich jede use,
Jede zaigt sich im Sennehemli und dr Schwingerbluuse,
So kunnt alles was Rang und Name hett uff Prattele,
Sogar d Beatrice Egli die blondi Dattele,
So au zwai Flitzer – was es nit alles gitt,
S Beatrice hett gsunge – d Flitzer schwinge mit.

Im Facebook und im Instagram postet jedes Dotteli,
Vo sich sälber doofi Fotteli,
Im Tiktok s isch doch glar,
Macht sich per Video jede zem Narr,
Obs Sinn macht oder nit,
Isch doch glyych – hauptsach s schwingt jede mit!

E Jeede dänggt es miessi sy,
Und hängt yberall sy Schnabel dry,
Me schnurrt und schnurrt was hesch was gisch,
Ob de druss kunnsch oder e Nichtwisser bisch,
Hauptsach s isch gschnurrt worde - ob d Wohret oder Shit,
Schyssegal – me schwingt halt mit!

Hesch de Zeedel begriffe oder nit,
Isch doch Wurscht – de schwingsch jo mit,
Mach doch nit jede Schyssdrägg mit,
Entscheid sälber ob de mitschwingsch oder nit!

Nit by jedem Saich uff Ärde,
Muess au mitgschwunge wärde.

R.m.ö

vogeserueche.ch

